

未来世诸佛，虽说百千亿，无数诸法门，其实为一乘。
诸佛两足尊，知法常无性，佛种从缘起，是故说一乘。
是法住法位，世间相常住，于道场知己，导师方便说。
天人所供养，现在十方佛，其数如恒沙，出现于世间，
安隐众生故，亦说如是法¹。知第一寂灭，以方便力故，
虽示种种道，其实为佛乘。知众生诸行，深心之所念，
过去所习业，欲性精进力，及诸根利钝，以种种因缘，
譬喻亦言辞，随应方便说。今我亦如是，安隐众生故，
以种种法门，宣示于佛道。我以智慧力，知众生性欲，
方便说诸法，皆令得欢喜。“舍利弗当知，我以佛眼观，
见六道众生，贫穷无福慧；入生死险道，相续苦不断，
深著于五欲，如牝牛爱尾²；以贪爱自蔽，盲冥无所见，
不求大势佛，及与断苦法；深入诸邪见，以苦欲舍苦，
为是众生故，而起大悲心³。我始坐道场，观树亦经行，
于三七日中，思惟如是事：‘我所得智慧，微妙最第一⁴，

¹ 《大乘本生心地观经》云：

如来不出于世间，一切众生入邪道，
永离甘露饮毒药，长溺苦海无出期。

² 《大宝积经·弥勒菩萨所问会》云：

佛常护禁戒，如犍牛爱尾，
最胜无伦匹，到于戒彼岸。

³ 《华严经》云：

哀愍众生故，我发菩提心，
当于无量劫，习行一切智。

⁴ 《方广大庄严经》云：

我得甘露无为法，甚深寂静离尘垢，
一切众生无能了，是故静处默然住。

众生诸根钝，著乐痴所盲，如斯之等类，云何而可度？’

尔时诸梵王，及诸天帝释，护世四天王，及大自在天，
并余诸天众，眷属百千万，恭敬合掌礼，请我转法轮。

我即自思惟：‘若但赞佛乘，众生没在苦，不能信是法；
破法不信故，坠于三恶道。我宁不说法，疾入于涅槃！’

寻念过去佛，所行方便力：‘我今所得道，亦应说三乘。’

作是思惟时，十方佛皆现，梵音慰喻我：‘善哉释迦文，
第一之导师，得是无上法！随诸一切佛，而用方便力，
我等亦皆得，最妙第一法，为诸众生类，分别说三乘。
少智乐小法，不自信作佛，是故以方便，分别说诸果，
虽复说三乘，但为教菩萨。’“舍利弗当知，我闻圣师子，
深净微妙音，喜称南无佛。复作如是念：‘我出浊恶世，
如诸佛所说，我亦随顺行。’思惟是事已，即趣波罗捺。

诸法寂灭相，不可以言宣，以方便力故，为五比丘说，
是名转法轮，便有涅槃音，及以阿罗汉，法僧差别名。

从久远劫来，赞示涅槃法，生死苦永尽，我常如是说。

“舍利弗当知，我见佛子等，志求佛道者，无量千万亿，
咸以恭敬心，皆来至佛所，曾从诸佛闻，方便所说法。

我即作是念：‘如来所以出，为说佛慧故，今正是其时。’

舍利弗当知，钝根小智人，著相憍慢者，不能信是法。

今我喜无畏，于诸菩萨中，正直舍方便，但说无上道。

菩萨闻是法，疑网皆已除，千二百罗汉，悉亦当作佛。
如三世诸佛，说法之仪式，我今亦如是，说无分别法。
诸佛兴出世，悬远值遇难！正使出于世，说是法复难！
无量无数劫，闻是法亦难！能听是法者，斯人亦复难！
譬如优昙华，一切皆爱乐，天人所希有，时时乃一出⁵；
闻法欢喜赞，乃至发一言，则为已供养，一切三世佛，
是人甚希有，过于优昙华。汝等勿有疑！我为诸法王，
普告诸大众，但以一乘道，教化诸菩萨，无声闻弟子。
“汝等舍利弗，声闻及菩萨，当知是妙法，诸佛之秘要。
以五浊恶世，但乐著诸欲，如是等众生，终不求佛道。
当来世恶人，闻佛说一乘，迷惑不信受，破法堕恶道⁶。
有惭愧清净，志求佛道者，当为如是等，广赞一乘道。
“舍利弗当知，诸佛法如是，以万亿方便，随宜而说法，

⁵《佛说无量寿经》云：[佛言：“善哉，阿难！所问甚快。发深智慧真妙辩才，愍念众生问斯慧义。如来以无尽大悲矜哀三界，所以出兴于世，光阐道教，普令群萌获真法利。无量亿劫难值难见，犹灵瑞华时时乃出。今所问者多所饶益，开化一切诸天人民。”]

⁶《佛说大乘菩萨藏正法经》云：

若人闻是正法已，令诸魔众悉远离，
而于一切佛法中，决定信解除疑惑。
若或薄福诸有情，于此正法不能听，
为彼有情薄福故，闻亦不能生信解。
或有具足福力者，听闻受持生信解，
于此正法少听闻，能遣一切诸魔事。
如是薄福诸有情，于此正法不生信，
以不信故堕恶趣，犹如生盲无所见。
若有具足福力者，于此正法深信解，
以深信故生善趣，速疾犹若酥投水。
一类少福诸有情，闻法展转生烦恼，
彼人长夜受苦恼，为愚痴故不解脱，
于佛菩提悉舍弃，速疾堕落恶趣中。

其不习学者，不能晓了此。汝等既已知，诸佛世之师，
随宜方便事，无复诸疑惑，心生大欢喜，自知当作佛。”]

《妙法莲花经·譬喻品》云：

[尔时，舍利弗踊跃欢喜，即起合掌，瞻仰尊颜，而白佛言：“今从世尊闻此法音，心怀踊跃，得未曾有。所以者何？我昔从佛闻如是法，见诸菩萨授记作佛，而我等不豫斯事，甚自感伤，失于如来无量知见。世尊，我常独处山林树下，若坐若行，每作是念：‘我等同入法性，云何如来以小乘法而见济度？是我等咎，非世尊也。所以者何？若我等待说所因成就阿耨多罗三藐三菩提者，必以大乘而得度脱；然我等不解方便随宜所说，初闻佛法，遇便信受，思惟取证。’世尊，我从昔来终日竟夜每自克责，而今从佛闻所未闻未曾有法，断诸疑悔，身意泰然，快得安隐。今日乃知真是佛子，从佛口生，从法化生，得佛法分。”

尔时，舍利弗欲重宣此义，而说偈言：

“我闻是法音，得所未曾有！
心怀大欢喜，疑网皆已除，
昔来蒙佛教，不失于大乘。
佛音甚希有，能除众生恼；
我已得漏尽，闻亦除忧恼⁷。
我处于山谷，或在树林下，
若坐若经行，常思惟是事，

⁷《菩萨念佛三昧经》云：

如来以一音，乃至恒河沙，
无量世界中，众生皆乐闻。

呜呼深自责：‘云何而自欺？
我等亦佛子，同入无漏法，
不能于未来，演说无上道。
金色三十二，十力诸解脱，
同共一法中，而不得此事。
八十种妙好，十八不共法，
如是等功德，而我皆已失。’
我独经行时，见佛在大众，
名闻满十方，广饶益众生，
自惟失此利，我为自欺诳。
我常于日夜，每思惟是事，
欲以问世尊，为失为不失？
我常见世尊，称赞诸菩萨，
以是于日夜，筹量如此事。
今闻佛音声，随宜而说法，
无漏难思议，令众至道场。
我本著邪见，为诸梵志师⁸；
世尊知我心，拔邪说涅槃。
我悉除邪见，于空法得证，

⁸《大方等大集经》云：

远离善知识，不闻清净法，
轮回生死中，为诸结所缚。

尔时心自谓，得至于灭度⁹，
而今乃自觉，非是实灭度。
若得作佛时，具三十二相，
天人夜叉众，龙神等恭敬，
是时乃可谓，永尽灭无余。
“佛于大众中，说我当作佛，
闻如是法音，疑悔悉已除。
初闻佛所说，心中大惊疑：
‘将非魔作佛，恼乱我心耶？’
佛以种种缘，譬喻巧言说，
其心安如海，我闻疑网断。
佛说过去世，无量灭度佛，
安住方便中，亦皆说是法。
现在未来佛，其数无有量，
亦以诸方便，演说如是法。
如今者世尊，从生及出家，
得道转法轮，亦以方便说。
世尊说实道，波旬无此事，
以是我定知，非是魔作佛，

⁹ 《佛本行集经》云：

诸法从因生，诸法从因灭，
如是灭与生，沙门说如是。

我堕疑网故，谓是魔所为。

闻佛柔软音，深远甚微妙，

演畅清净法，我心大欢喜，

疑悔永已尽，安住实智中。

我定当作佛，为天人所敬，

转无上法轮，教化诸菩萨。”

尔时，佛告舍利弗：“吾今于天、人、沙门、婆罗门等大众中说：我昔曾于二
万亿佛所，为无上道故常教化汝，汝亦长夜随我受学，我以方便引导汝故生我法
中。舍利弗，我昔教汝志愿佛道，汝今悉忘，而便自谓已得灭度。我今还欲令汝忆
念本愿所行道故，为诸声闻说是大乘经，名《妙法莲华》，教菩萨法佛所护念。

“舍利弗，汝于未来世过无量无边不可思议劫，供养若干千万亿佛，奉持正法，具
足菩萨所行之道，当得作佛，号曰华光如来、应供、正遍知、明行足、善逝、世间
解、无上士、调御丈夫、天人师、佛、世尊，国名离垢。其土平正，清净严饰，安
隐丰乐，天人炽盛。琉璃为地，有八交道，黄金为绳以界其侧。其傍各有七宝行
树，常有华果。华光如来亦以三乘教化众生。

“舍利弗，彼佛出时虽非恶世，以本愿故说三乘法。其劫名大宝庄严。何故名
曰大宝庄严？其国中以菩萨为大宝故。彼诸菩萨无量无边不可思议，算数譬喻所不
能及，非佛智力无能知者。若欲行时，宝华承足。此诸菩萨非初发意，皆久植德
本，于无量百千万亿佛所净修梵行，恒为诸佛之所称叹，常修佛慧，具大神通，善
知一切诸法之门，质直无伪，志念坚固，如是菩萨充满其国。

“舍利弗，华光佛寿十二小劫，除为王子未作佛时。其国人民寿八小劫。华光如来过十二小劫，授坚满菩萨阿耨多罗三藐三菩提记，告诸比丘：‘是坚满菩萨次当作佛，号曰华足安行多陀阿伽度阿罗诃三藐三佛陀¹⁰，其佛国土亦复如是。’舍利弗，是华光佛灭度之后，正法住世三十二小劫，像法住世亦三十二小劫。”

尔时，世尊欲重宣此义，而说偈言：

“舍利弗来世，成佛普智尊，
号名曰华光，当度无量众。
供养无数佛，具足菩萨行，
十力等功德，证于无上道。
过无量劫已，劫名大宝严，
世界名离垢，清净无瑕秽，
以琉璃为地，金绳界其道，
七宝杂色树，常有华果实。
彼国诸菩萨，志念常坚固，
神通波罗蜜，皆已悉具足¹¹，
于无数佛所，善学菩萨道，
如是等大士，华光佛所化。
佛为王子时，弃国舍世荣，

¹⁰ 多陀阿伽度阿罗诃三藐三佛陀：多陀阿伽度者如来。阿罗诃者应供。三藐三佛陀者正遍知。如来十号中之三号。

¹¹ 《摩诃般若波罗蜜经》云：“须菩提，菩萨若远离神通，不能随众生意善说法。以是故，须菩提，菩萨摩诃萨行般若波罗蜜时应起神通。须菩提，譬如鸟无翅不能高翔，菩萨无神通不能随意教化众生。以是故，须菩提，菩萨摩诃萨行般若波罗蜜应起诸神通，起诸神通已若欲饶益众生随意能益。”

于最末后身，出家成佛道。
华光佛住世，寿十二小劫；
其国人民众，寿命八小劫；
佛灭度之后，正法住于世，
三十二小劫，广度诸众生；
正法灭尽已，像法三十二¹²，
舍利广流布，天人普供养。
华光佛所为，其事皆如是，
其两足圣尊，最胜无伦匹，
彼即是汝身，宜应自欣庆！”

尔时，四部众比丘、比丘尼、优婆塞、优婆夷，天、龙、夜叉、乾闥婆、阿修罗、迦楼罗¹³、紧那罗¹⁴、摩睺罗伽¹⁵等大众，见舍利弗于佛前受阿耨多罗三藐三菩提记，心大欢喜踊跃无量，各各脱身所著上衣以供养佛。释提桓因、梵天王等，与无数天子，亦以天妙衣、天曼陀罗华¹⁶、摩诃曼陀罗华等供养于佛。所散天衣住虚空中而自回转，诸天伎乐百千万种于虚空中一时俱作，雨众天华。

¹² 本师释迦牟尼佛陀的教法住世的时间有如下的差别，《佛祖统纪》中记载有五个阶段：

- 一、解脱坚固五百年；
- 二、禅定坚固五百年；
- 三、多闻坚固五百年；
- 四、福德坚固（像法坚固）五百年；
- 五、净斗坚固五百年。

¹³ 迦楼罗：梵音 Garuḍa，汉译“大鹏金翅鸟”。

¹⁴ 紧那罗：梵音 kiṃnara，汉译“人非人”。

¹⁵ 摩睺罗伽：梵语 Mahoraga，汉译“大蛇”。

¹⁶ 曼陀罗华：佛教用语，指开在天上的大白莲花。（天界四大名花：曼陀罗华—白莲花；摩诃曼陀罗华—大白莲花；曼殊沙华—赤莲花；摩诃曼殊沙华—大赤莲花）

而作是言：

“佛昔于波罗奈初转法轮，今乃复转无上最大法轮。”

尔时，诸天子欲重宣此义，而说偈言：

“昔于波罗奈，转四谛法轮，
分别说诸法，五众之生灭。
今复转最妙，无上大法轮，
是法甚深奥，少有能信者¹⁷。
我等从昔来，数闻世尊说，
未曾闻如是，深妙之上法，
世尊说是法，我等皆随喜。
大智舍利弗，今得受尊记，
我等亦如是，必当得作佛，
于一切世间，最尊无有上。
佛道叵思议，方便随宜说，
我所有福业，今世若过世，
及见佛功德，尽回向佛道。”

¹⁷《中观四百颂·明菩萨行品》云：

如是甚深法，愚夫生恐惧，
如是劣根者，怖最希有法。